

四庫全書

集部

欽定四庫全書

集部

東漢文紀卷二十

詳校官庶吉士臣陳若霖

主事銜臣徐以坤覆勘

總校官進士臣楊懋珩

校對官中書臣范鏊

謄錄監生臣周桐

欽定四庫全書

東漢文紀卷二十

明 梅鼎祚 編

蔡邕二

歷元議

熹平四年五官郎中馮光沛相上計掾陳晃言歷元不正故妖民叛寇益州盜

賊相續為歷用甲寅為元而用庚申圖緯無以庚為元者近秦所用代周之元太史治歷郎中郭香劉固意造妄說乞與本庚申元經緯有明受虛欺重誅詔下三府與儒林明道者詳議務得道真以羣臣會司徒府議議郎臣蔡邕議上公卿以邕議劾晃不敬正鬼新法詔勿治○後漢書志復據太平御覽補入邕集不載

歷數精微去聖久遠得失更迭術術無常是以漢承秦
正歷用顓頊元用乙卯百有二歲孝武皇帝始改正朔
歷用太初元用丁丑行之百八十九歲孝章皇帝用清
河李梵之言改從四分元用庚申今光晷各以庚申為
非甲寅為是案歷法黃帝顓頊夏殷周魯凡六家各自
有元光晷所據則殷歷元也他元雖不明於圖讖各自
一家之術皆當有效於其當時黃帝始用太初丁丑之
元有六家紛錯爭訟是非太史令張壽王挾甲寅元以

非漢歷雜候清臺課在下第卒以䟽闊連見劾奏太初
效驗無所漏失是則雖非圖讖之元而有效於前者也
及用四分以來考之行度密於太初是又新元效於今
者也延光元年中謁者亶誦亦非四分庚申上言當用
命歷序甲寅元公卿百寮奏議正處竟不施行且三光
之行遲速進退不必若一術家以算追而求之取合於
當時而已故有古今之術今之不能上通於古亦猶古
術之不能下通於今也由此言之有文於讖無驗於今

未必為是有驗於今無文於識未必為非元命苞乾鑿
度皆以為開闢至獲麟二百七十六萬歲及命歷序積
獲麟至漢起庚子部之二十三歲竟巳酉戊子及丁卯
部六十九歲合為二百七十五歲漢元年歲在乙未上
至獲麟則歲在庚申推此以上上極開闢則不在庚申
識雖無文其數見存而光是以為開闢至獲麟二百七
十五萬九千八百八十六歲獲麟至漢百六十二歲轉
差少一百十四歲云當滿足則上違乾鑿度元命苞中

使獲麟不得在哀公十四年下不及命歷序獲麟漢相
去四部年數與奏記譜注不相應當今歷正月癸亥朔
光晃以為乙丑朔乙丑之與癸亥無題勒款識可與衆
共別者須以弦望晦朔光魄虧滿可得而見者考其符
驗而光晃歷以考靈曜二十八宿度數及冬至日所在
與今史官甘石舊文錯異不可考校以今渾天圖儀檢
天文亦不合於考靈曜光晃誠能自依其術更造望儀
以追天度遠有驗於圖書近有效於三光可以易奪甘

石窮服諸術者實宜用之難問光晃但言圖讖所言不服元和二年二月甲寅制書曰朕聞古先聖王先天而天不違後天而奉天時史官用太初鄧平術冬至之日在斗二十二度而歷以為牽牛中星先立春一日則四分數之立春也而以折獄斷大刑於氣已迂用望平和蓋亦遠矣今改行四分以遵於堯以順孔聖奉天之文是始用四分歷庚申元之詔也深引河洛圖讖以為符驗非史官私意獨所興構而光晃以為固意造妄說

違反經文謬之甚者昔堯命羲和歷象日月星辰舜叶
時月正日湯武革命治歷明時可謂正矣且猶遇水遭
旱戒以蠻夷猾夏寇賊姦宄而光晃以為陰陽不和姦
臣盜賊皆元之咎誠非其理元和二年乃用庚申至今
九十二歲而光晃言秦所用代周之元不知從秦來漢
三易元不常庚申光晃言區區信用所學亦妄虛無造欺
語之愆至於改朔易元往者壽王之術已課不效豈誦
之義不用元和詔書文脩義著非羣臣議者所能變易

蔡邕集載三月九日百官會府公殿下東南校尉南面侍中即將大夫千石六百石重行北面議郎博士西面戶曹令史當坐而讀詔書公議蔡邕前坐侍中西北近公卿與光晃相難問是非焉

難夏育擊鮮卑議

熹平六年護烏桓校尉育上言鮮卑仍犯諸郡自春以來

三十餘發請徵幽州諸郡兵出塞擊之一冬春足以掃滅時故護羌校尉田晏為破鮮卑中郎將三道並出朝廷多以為不便詔百官會議中郎蔡邕議止

書戒猾夏易伐鬼方周宣王命南仲吉甫攘獫狁威蠻荆漢有衛霍閼顏瀚海竇憲燕然之事征討之作所由尚矣然而時有同異勢有可否故謀有得失事有成敗

不可齊也。自漢興已來，匈奴常為邊害，而未聞鮮卑之事。昔謀臣竭精，武夫戮力，而所見常異。其設不戰之計，守禦之因者，皆社稷之臣永久之策也。孝武皇帝因丈景之畜用，度饒衍，南伐越，北伐胡，西征大宛，東并朝鮮，兵出數十年，帑藏空竭，官民俱匱，乃興鹽鐵酤權之利，設告緡重稅之令，民不堪命，及盜賊羣起，關東紛然，道路不通，繡衣直指之使，奮鈇鉞而並出，然後僅得寧息。既而覺悟，乃封丞相為富民侯。故主父偃曰：夫務戰勝

窮武事未有不悔者也夫世宗神武將卒良猛財賦充實所拓廣遠而猶有悔況無彼時地利人財之脩而欲輕動此其不可一也鮮卑種衆新盛自匈奴北遁以來據其故地稱兵十萬彌地千里意智益生財力勁健加以禁網漏洩善金良鐵出者莫察漢人逋逃為其謀主兵利馬疾過於匈奴昔段熲良將習兵善戰經營西羌猶十餘年今育晏欲以三年之期專勝必克育晏策慮未能過類鮮卑種衆又不弱於西羌也乃欲張設近期

誘戲朝廷三年不成必迫於害禍結兵連不得中休轉
運糧餉不可勝給天無豐歲官見殫財民人流移於四
方不能還其骸骨以此時興議橫發一發不已必至再
三諸夏之內弱者伏尸彊者作寇邊郵之患手足之疥
癢也中國之困胷背之癰疽也其不可二也育云自春
以來三十餘發方今郡縣盜賊劫剽人財攻犯官民日
月有之冠帶之圻吏調政密猶不能絕況此醜虜羣類
抵冒心不受仁膽不畏威而可使斷無盜竊昔者高祖

乃忍平城之恥呂后甘棄嫚書之詬方之於今何者為甚是其不可三也天設山河秦築長城漢起塞垣所以別內外異殊俗也其外則介之夷狄其內則任之良吏後嗣遵業慎奉所遺苟無感國內侮之患豈與虫螳之虜校往來之數哉乃欲越幕踰域度塞出攻得地不可耕農得民不可冠帶破之不可殄盡而本朝必為之肝食四海必為之焦枯其不可四也夫煎盡府帑之蓄以恣輕事之人專勝者未必克挾疑者未必敗衆所謂危

聖人不任朝議有嫌明主不行是其不可五也按育一戰所獲不如所失昔淮南王安諫伐越曰天子之兵有征無戰言其莫敢校也使越人蒙死徼幸以逆執事廝與之卒有不脩而歸者雖得越王之首猶為大漢之羞威化不行則欲伐之狐疑避難則守為長宜通乎時變且憂萬人饑餓與蠻夷之不討何者為大宗廟之祭凶年不脩况避不遜之辱哉今關東大困無以相贍又議動兵非但勞人凶年隨之其罷敝有不可勝言者此先

帝所以發德音也夫卹民救患雖成郡列縣尚猶棄之况以郵塞之外未嘗為人居者乎臣愚以為宜止征伐之討令諸營甲士循行塞垣屯守衝要以堅牢不動為務若乃守邊之術李牧開其原巖尤申其要遺業猶在文章具存循二子之策守先帝之規臣曰可矣臣邕愚戇議不足采臣邕頓首頓首

宗廟迭毀議

獻帝即位初平中相國董卓左中郎將蔡邕等以和帝以下功德無

殊而有過差不應為宗及餘非宗者追尊三后皆奏毀之○袁山松後漢書載邕議劉昭

志引

左中郎將臣邕議以為漢承亡秦滅學之後宗廟之制不用周禮每帝即位世輒立一廟不止於七不列昭穆不定迭毀孝元皇帝時丞相匡衡御史大夫貢禹始建大議請依典禮孝文孝武孝宣皆以功德茂盛為宗不毀孝宣尊崇孝武歷稱世宗時忠正大臣夏侯勝猶執異議欲出世宗至孝成帝議猶不定太僕王舜中壘校尉劉歆據經傳義謂不可毀上從其議古人考據慎重

不敢私其君父若此其至也後遭王莽之亂光武皇帝受命中興廟稱世祖孝明皇帝聖德聰明政參文宣廟稱顯宗孝章皇帝至孝烝烝仁恩溥大海內賴祉廟稱肅宗比方前事得禮之宜自此以下政事多釁權移臣下嗣帝殷勤各欲褒崇至親而已臣懦弱莫能執夏侯之直故遂行溢無有方限今聖朝遵古復禮以求厥中誠合事宜禮傳封儀自依家法今不知國家舊有宗儀聖主賢臣所共創定欲就六廟黜損所宗違先帝舊章

未可施行臣謹按禮制七廟三昭三穆與太祖七孝元
皇帝在世第八光武皇帝世在第九故以元帝為考廟
尊而奉之孝明遵制亦不敢毀元帝於今朝九世以七
廟言之則非所宗八月報酬可出元帝主比惠景昭成
哀平帝五年一致祭孝章皇帝孝桓皇帝親在三昭孝
和皇帝孝順皇帝孝靈皇帝親在三穆廟親未盡四時
常陳孝明以下穆宗敬宗恭宗之號皆宜省去以遵先
典殊異祖宗不可奉並之義今又總就一堂崇約尚省

不復改作惟主及几筵應改而已正數世之所闕為無窮之常典稽禮制之舊則合神明之歡心臣愚竊議不足採臣邕頓首頓首

答齋議

日月詔召尚書問立春當齋迎氣東郊尚書左丞馮方毆殺指揮使於尚書西祠可齋否得無不宜具對議即臣蔡邕博士任敏死罪對按禮上帝之祠無所為廢齋者所以致齊不敢渙散其意宮室至大指使至微不在

齋潔之處元和詔禮無免齋宜以自潔淨交神明本無嫌間祠室又寬可齋無疑詩云唯此文王小心翼翼昭事上帝聿懷多福夫齋以恭奉明祀文王所以懷福無有不宜臣邕敏愚慙死罪

和熹鄧后謚議

初平中蔡邕始追正和熹之號

孝和鄧皇后崩羣臣謀謚於是尚書陳忠上言以為鄉黨叙孔子威儀俯仰無所遺彤管記君王纖微大小無不舉是以德著圖籍名垂於後伏惟大行皇后規乾則

坤魚包日月厥初作合允有休烈貫魚之次加於小滕
中饋之叙昭於帷幄遭家不造三元之厄孝殤幼冲國
祚中絕海內紛然羣臣累息加以洪流為災札荒為害
西戎蠢動武威侵侮并涼猾夏作寇振驚渤海家有採
薇之思人懷殿屎之聲皇太后恭圖考表求人之瘼度
越平原建立聖主垂疇咨之問遵六事之求勞謙克躬
菲薄為務是以尚官損服衣不絮英饗人徹羞膳不過
擇黃門闕樂魚龍不作織室絕伎纂組不經尚方抑巧

雕鏤不為離宮罕幸儲峙不施遐方斷篚侏離不貢罷
出宮妾免遣宗室沒入者六百餘人以紓鬱滯奉率舊
禮交饗祖廟以展孝子承歡之敬蠲正憲法六千餘事
以順漢氏三百之期經藝垂舛恐史闕文命衆儒考校
東觀閣學博士一缺廣選十人何有伐檀茅茹不拔屢
舉方直顯擢孝子遵忠孝之紀啟大臣喪親之哀疾貪
吏受取為姦糾增舊科之罰惡長吏虛偽錮之十年追
崇世祖功臣國土或有斷絕封植遺苗以奉其祀爵高

蘭諸國盾子以紹三王之後事不稽古不以為政政不
惠和不圖於策猶不自專傳謀遠暨允求厥中刑之所
加不阿近戚賞之所及不遺側陋終朝反側明發不寢
徒以百姓為憂不以天下為樂聖誠著於禁闥而德教
被於萬國故自昏墊迄於康乂叛虜蜂集賊害邊陲永
元之世以為遺誅今畏服威靈稽顙即斃徼外絕國慕
義重譯來獻其琛史官咸賀請作主頌却而不聽郡國
咸上瑞應寢而不宣允恭抑損密勿在勤遭疾不豫垂

念臣子御輦在殿顧命羣司流恩布澤大赦天下有始
有卒同符先聖昔書契所載虞帝二妃夏后塗山高陽
有辛姬氏任母徒以正身率內思媚周京為高未有如
大行皇后勤精勞思篤繼國之祚正三元之衡康百六
之會消无妄之運者也功德巍巍誠不可及漢世后氏
無謚至於明帝始建光烈之稱是後轉因帝號加以
謚高下優劣混而為一違禮大行受大名小行受小名
之制謚法有功安居曰熹帝后謚禮亦宜同大行皇太

后宜謚為和熹皇后上稽典訓之正下協先帝之稱

朱公叔謚議

漢益州刺史南陽朱公叔卒門人陳季珪等議所謚云
宜曰忠文子陳留蔡邕議曰昔在聖人之制謚也將以
勸善彰惡俾民興行賢愚臧否依事從實雖文武之美
幽厲之穢罔不具存自王公以降至於列國大夫皆用
配號傳於無窮秦以世言謚而黜其事漢興以來惟天
子與五等之爵然後有之公卿大臣其禮闕焉歷世彌

久莫之或修益州府君貫綜典術率由舊章始與諸儒
考禮定議加陳留府君以益州之謚是後覽之者亦無
間焉今子亶纂襲前業不忘遺則孝既至矣禮實宜之
謹覽陳生之議思忠文之意參之羣典籍之謚法夫萬
類莫貴乎人百行莫美乎忠故夏后氏正以人統教以
忠德然則忠也者人德之至也而猶有三馬孔子曰進
思盡忠又曰臣事君以忠奉上之忠也曰為人謀而不
忠乎又曰忠焉能勿誨乎謀誨之忠也春秋左傳曰小

大之獄必以情情忠之屬也又曰上思利人曰忠撫下之忠也三者人之則而忠行乎其中益州府君自始事至沒身忠言不輟乎口忠謀不已乎心其在帝室正身危行言如砥矢策合神明蹇蹇之諫文章具存奉上忠矣其在部臣匡救善導出自一心疑不我聽者果有躡覆不測之禍謀誨忠矣爰牧冀州時值凶荒勞心苦思勤恤度事誅斃貪暴糾戢貴黨雖則強禦當官能行夫豈淫刑將有利也發墓盜柩議而不罪夫豈漏姦察以

情也撫下忠矣位在牧伯職據納言秉權食祿實有年
數而居無蓄好財貨不益舊糲食布衾絜謂之精麗者
昔魯季孫行父卒宰庀家器無衣帛之妾無食粟之馬
君子曰相三君矣而無私積可不謂忠乎而諡曰文子
春秋外傳曰忠文之實也然則文忠之彰也忠以為實
文以彰之事通議合兩名一致是貞儉之稱文也邾子
邴繇卜遷於繹史曰利於民不利於君公曰民苟利矣
孤亦與焉於是遷而遂卒諡曰文公是危身利民之稱

文也衛大夫孔圉謚曰文子子貢疑焉惟敏而好學不
恥下問仲尼與之是勤學好問之稱文也府君所在屢
以忤違陷以深患苟除民害死生以前後三黜一罹
疾廢於身危矣兼包六典命世作師猶復宗事趙叟示
有攸尊能下問矣有一於此猶可以稱況乃忠兼三義
文脩三德於古志不悖而謚法亦曰宜矣本議曰忠文
子按古之以子配謚者魯之季文子孟懿子衛之孫文
子公叔文子皆諸侯之臣也至於王室之卿大夫其尊

與諸侯並故以公配春秋曰劉卷卒葬劉文公公羊傳
曰劉卷者何天子大夫也經又曰王子虎卒左傳曰王
叔文公卒而如同盟禮也此皆天子大夫得稱公禮與
同盟諸侯敵體故也又禮緣臣子咸欲尊其君父故雖
侯伯子男之臣自稱其君咸得曰公及其卒也異國之
人稱之皆然是以邾子許男稱公以葬春秋之正義也
以例言之則府君王室亞卿也有王叔劉氏之比以臣
子之辭言之則有邾許稱公之文雖無土而其位是也

今曰公猶可若稱子則降等多矣懼禮廢日久將詭時
聽周有仲山甫伯陽嘉父優老之稱也宋有正考父魯
有尼父配謚之稱也春秋曰孔父子曰伯某父亡之稱
也父雖非爵號與天子諸侯咸用優賢禮同順乎門人
臣子所稱之宜可於公父之中擇一處焉使不得稱子
而已

明堂月令論

明堂者天子太廟所以崇禮其祖以配上帝者也夏后

氏曰世室殷人曰重屋周人曰明堂東曰青陽南曰明
堂西曰總章北曰元堂中央曰太室易曰離也者明也
南方之卦也聖人南面而聽天下嚮明而治人君之位
莫正於此焉故雖有五名而主以明堂也其正中皆曰
太廟謹承天順時之令昭令德宗祀之禮明前功百辟
之勞起養老敬長之義顯教幼誨穉之學朝諸侯選造
士於其中以明制度生者乘其能而至死者論其功而
祭故為大教之宮而四學具焉官司脩焉譬如北辰居

其所而衆星拱之萬象翼之政教之所由生變化之所由來明一統也故言明堂事之大義之深也取其宗祀之貌則曰清廟取其正室之貌則曰太廟取其尊崇則曰太室取其向明則曰明堂取其四門之學則曰太學取其四面周水圓如壁則曰辟廱異名而同事其實一也春秋因魯取宋之奸賂則顯之太廟以明聖王建清廟明堂之義經曰取郕大鼎於宋戊申納於太廟傳曰非禮也君人者將昭德塞違故昭令德以示子孫是以

清廟茅屋昭其儉也夫德儉而有度升降有數文物以紀之聲明以發之以臨照百官百官於是乎戒懼而不敢易紀律所以明大教也以周清廟論之魯太廟皆明堂也魯禘祀周公於太廟明堂猶周宗祀文王於清廟明堂也禮記檀弓曰王齋禘於清廟明堂也孝經曰宗祀文王於明堂禮記明堂位曰太廟天子曰明堂又曰成王幼弱周公踐天子位以治天下朝諸侯於明堂制禮作樂頒度量而天下大服成王以周公有大勲勞於

天下命魯公世世禘祀周公於太廟以天子之禮升歌清廟下管象舞所以異魯於天下也取周清廟之歌歌於魯太廟明魯之太廟猶周之清廟也皆所以昭文王周公之德以示子孫也易傳太初篇曰天子旦入東學晝入南學暮入西學太學在中央天子之所自學也禮記保傅篇曰帝入東學上親而貴仁入西學上賢而貴德入南學上齒而貴信入北學上貴而尊爵入太學承師而問道與易傳同魏文侯孝經傳曰太學者中學明

堂之位也禮記古大明堂之禮曰膳夫是相禮日中出
南闥見九侯反問於相日側出西闥視五國之事日入
出北闥視帝節猷爾雅曰宮中之門謂之闥王居明堂
之禮又別陰陽門東南稱門西北稱闥故周官有門闥
之學師氏教以三德守王門保氏教以六藝守王闥然
則師氏居東門南門保氏居西門北門也知掌教國子
與易傳保傅王居明堂之禮泰相發明為學四馬文王
世子篇曰凡大合樂則遂養老天子至乃命有司行事

興秩節祭先師先聖焉始之養也適東序釋奠於先老
遂設三老五更之席位言教學始之於養老由東方歲
始也又春夏學干戈秋冬學羽籥皆習於東序凡祭與
養老乞言合語之禮皆小樂正詔之於東序又曰大司
成論說在東序然則詔學皆在東序東序東之堂也學
者聚焉故稱詔太學仲夏之月令祀百辟卿士之有德
於民者禮記太學志曰禮士大夫學於聖人善人祭於
明堂其無位者祭於太學禮記昭穆篇曰祀先賢於西

學所以教諸侯之德也即所以顯行國禮之處也太學
明堂之東序也皆在明堂辟廡之內月令記曰明堂者
所以明天氣統萬物明堂上通於天象日辰故下十二
宮象日辰也水環四周言王者動作法天地德廣及四
海方此水也禮記盛德篇曰明堂九室以茅蓋屋上圓
下方此水名曰辟廡王制曰天子出征執有罪反釋奠
於學以訊馘告樂記曰武王伐殷薦俘馘於京太室詩
魯頌云矯矯虎臣在泮獻馘京鎬京也太室辟廡之中

明堂太室也與諸侯泮宮俱獻馘焉即王制所謂以訊馘告者也禮記曰祀乎明堂所以教諸侯之孝也孝經曰孝悌之至通於神明光於四海無所不通詩云自西自東自南自北無思不服言行孝者則曰明堂行悌者則曰太學故孝經合以為一義而稱錫京之詩以明之凡此皆明堂太室辟廱太學事通文合之義也其制度數各有所法堂方百四十四尺坤之策也屋圜屋徑二百一十六尺乾之策也太廟明堂方三十六丈通天屋

徑九丈陰陽九六之變也圖蓋方載六九之道也八閭以象八卦九室以象九州十二宮以應辰三十六戶七十二牖以四戶九牖乘九室之數戶外皆外設而不閉示天下不藏也通天屋高八十一尺黃鍾九九之實也二十八柱列於四方亦七宿之象也堂高三丈以應三統四鄉五色者象其行外廣二十四丈應一歲二十四氣四周以水象四海王者之大禮也月令篇名曰因天時制人事天子發號施令祀神受職每月異禮故謂之月

令所以順陰陽奉四時效氣物行王政也成法具脩各從時月藏之明堂所以示承祖考神明明不敢泄瀆之義故以明堂冠月令自天地定位有其象聖帝明君世有紹襲蓋以裁成大業非一代之事也易正月之卦曰泰其經曰王用享於帝吉孟春令曰擇元日祈穀於上帝顓頊歷衡曰天元正月己巳朔日立春日月俱起於泰建宮室制度月令孟春之月日在營室堯典曰乃命羲和欽若昊天歷象日月星辰敬授人時令曰乃命太

史守典奉法司天日月星辰之行易曰不利為寇利用
禦寇令曰兵戎不起不可從我始書曰歲二月同律度
量衡中春令曰日夜分則同度量鈞衡石凡此皆合於
大歷唐政其類不可盡稱戴禮夏小正傳曰陰陽生物
之後王事之次則夏之月令也殷人無文及周而脩文
義所說傳衍深遠宜周公之所著也官號職司與周官
合周書七十二篇而月令第五十三古者諸侯朝正於
天子受月令以歸而藏諸廟中天子藏之於明堂每月

告朔朝廟出而行之周室既衰諸侯怠於禮魯文公廢告朔而朝仲尼譏之經曰閏月不告朔猶朝於廟刺舍大禮而徇小儀也自是告朔遂闕而徒用其羊子貢非廢其令而請去之仲尼曰賜也爾愛其羊我愛其禮庶明王復興君人者昭而明之稽而用之耳無逆聽令無逆政所以臻乎大順陰陽和年穀豐太平洽符瑞由此而至矣秦相呂不韋著書取月令為紀號淮南王安亦以取為第四篇改名曰時則故偏見之徒或云月令呂

不韋作或云淮南皆非也

月令問答

問者曰子何為著月令說也予幼讀記以為月令體大經同不宜與記書雜錄並行而記家記之又畧及前儒特為章句者皆用其意傳非其本旨又不知月令徵驗布在諸經周官左傳實與禮記通他議橫生紛紛久矣光和元年被謗章惟重罪徙朔方上有獫狁敵衝之讐外有寇虜鋒鏑之艱危險凜凜死亡無日遇被學者

開家就而考之亦自有所覺悟庶幾頗得事情而訖未
有注記著於文字也懼顛蹶隕墜無以示後同於朽腐
竊誠思之書有陰陽升降天文歷數事物制度可假以
為本敦辭托說審求歷象其要者莫大於月令故遂於
憂怖之中晝夜密勿昧死成之旁貫五注參互羣書至
及國家律令制度遂定歷數盡天地三光之情辭繁多
而蔓衍非所謂理約而達也道長日短危殆兢惕取其
心盡而已故不能復加刪省蓋所以探賾辨物庶幾多

識前言往行之流苟使學者以為可覽則余死而不朽也

問者曰子說月令多類周官左傳假無周官左傳月令為無說乎曰夫根柢植則枝葉必相從也月令與周官竝為時王政令之記異文而同體官名百職皆周官解月令甲子沈子所謂似春秋也若夫太昊蓍收勾芒祝融之屬左傳造義立說生名者同是以用之

問者曰既用古文於歷數乃不用三統用四分何也曰

月令所用參諸歷象非一家之事傳之於世不曉學者
宜以當時所施行夫密近者三統已踈闊廢弛故不用
也

問者曰既不用三統以驚蟄為孟春春中雨水為二月
節皆三統法也獨用之何曰孟春月令曰蟄蟲始震在
正月也中春始雨水則雨水二月也以其合故用之

問者曰歷云小暑季夏節也而今文見於五月何也曰
今不以歷節言據時始暑而記也歷於大雪小雪大寒

小寒皆去十五日然則小暑當去大暑十五日不得及四十五日不以節言據時暑也

問者曰中春令不用犧牲以珪璧更皮幣不犧牲何也曰是月獻羔以太牢祀高禩宗廟之祭以中月安得用犧牲祈者求之祭也著令者豫設水旱疫癘當禱祈用犧牲者是用之助生養傳祈以幣代牲章因於高禩之事乃造說曰更者刻木代牲如廟有桃更此說自欺極矣經典傳記無刻木代牲之說蓋書有轉誤三豕渡河

之類也

問者曰中冬令曰奄尹申宮令謹門閭今日門閭何也
曰閭尹者內官也主宮室出入宮中宮中之門曰閭閭
尹之職也閭里門非閭尹所主知當作閭也

問者曰令曰七駟咸駕今日六駟何也曰本官職者莫
正於周官天子馬六種種別有駟故知六駟左氏傳晉
程鄭為乘馬御六駟屬馬無言七者知當為六也

問者曰令以中秋築城郭於經傳為非其時詩曰定之

方中作於楚宮定營室也九月十月之交西南方中故傳曰小昏正而栽築即營室也昏正者昏中也栽築者栽木而始築也今文在前一月不合於經傳也

問者曰子說三難皆以日行為本古論周官禮記說以為但逐惡而已獨安所取之曰取之於月令而已四時通等而夏無難文由日行也春行少陰秋行少陽冬行太陰陰陽背使不於其類故冬春難以助陽秋難以達陰至夏節太陽行太陰自得其類無所扶助獨不難取

之於是也

問者曰反令每行一時轉三旬以應行三月政也春行夏令則雨水不時謂孟夏也草木蚤枯中夏也國乃有恐季夏也今總合為一事不分別施之於三月何也曰說者見其三旬不得傳注而為之說有所滯礙不得通矣孟秋反令行冬令則草木枯後乃大水敗其城郭即分為三事後乃大水在誰後也城郭為獨自壞非水所為也季冬令曰行春令則胎夭多傷民多蠱疾命之曰

逆即分為三事行季冬令為不感灾異但命之曰逆也
知不得斷絕分應一月也其類皆如此令之所述略舉
其尤者也

問春食麥羊夏食菽雞秋食麻犬冬食黍豕之屬但以
為時味之宜不合於五行月令服食器械之制皆順五
行者也說所食獨不以五行不已略乎曰蓋亦思之矣
凡十二辰之禽五時所食者必家人所蓄丑牛未羊戌
犬酉雞亥豕而已其餘龍虎以下非食也春木王木勝

土土王四季四季之禽牛屬季夏犬屬季秋故未羊可
以為春食也夏火王火勝金故酉雞可以為夏食也季
夏土王土勝水當食豕而食牛土五行之尊者牛五畜
之大者四行之牲無足以配土德者故以牛為季夏食
也秋金王金勝木寅虎非可食者犬豕而無角虎屬也
故以犬為秋食也冬水王水勝火當食馬而禮不以馬
為牲故以其類而食豕也然則麥為木菽為金麻為火
黍為水各配其牲為食也雖有此說而米鹽精粹不合

於易卦所為之禽及洪範傳五事之畜近似卜筮之術
故予畧之不以為章句聊以應問見有說而已

問記曰三老五更子獨曰五叟周禮曰八十一御妻今
曰御妾何也曰字誤也叟長老之稱其字與更相似書
者轉誤遂以為更嫂字女旁瘦字從叟今皆以為更矣
立字法者不以形聲何得以為字以嫂瘦推之知是更
為叟也妻者齊也惟一適人稱妻其餘皆妾位最在下
是以不得言妻云也

正交論

聞之前訓曰君子以朋友講習而正人無有淫朋是以古之交者其義敦以正其誓信以固逮夫周德始衰頌聲既寢伐木有鳥鳴之刺谷風有棄予之怨其所由來政之闕也自此以降彌以陵遲或闕其始終或彊其比周是以縉紳患其然而論者諄諄如也疾淺薄而懷攜貳者有之惡朋黨而絕交游者有之其論交也曰富貴則人爭趨之貧賤則人爭去之是以君子慎人所以交

已審已所以交人富貴則無暴集之客貧賤則無棄舊之賓矣原其所以來則知其所以去見其所以始則觀其所以終彼貞士者貧賤不待夫富貴富貴不驕乎貧賤故可貴也蓋朋友之道有義則合無義則離善則久要不忘平生之言惡則忠告善誨之否則止無自辱焉故君子不為可棄之行不患人之遺已也信有可歸之德不病人之遠已也不幸或然則躬自厚而薄責於人怨其遠矣求諸已而不求諸人咎其稀矣夫遠怨稀咎

之機咸在乎躬莫之致也子夏之門人問交於子張而
二子各有聞乎夫子然則以交誨也商也寬故告之以
拒人師也褊故訓之以容衆各從其行而矯之至於仲
尼之正教則泛愛衆而親仁故非善不喜非仁不親交
游以方會友以文可無貶也穀梁赤曰心志既通名譽
不聞友之罪也今將患其流而塞其源病其末而刈其
本無乃未若擇其正而黜其邪與其彼農皆黍而獨
稷焉夫黍亦神農之嘉穀與稷並為粱盛也使交可廢

則泰其愆矣括二論而言之則刺薄者博而洽斷交者
貞而孤孤有羔羊之節與其不獲已而矯時也走將從
夫孤焉

桓彬論

彬麟之子少與蔡邕齊名仕尚書郎厲志操以忤宦黨免官卒邕等共論序其

志乃樹碑而頌焉

彬有過人者四夙智早成岐嶷也學優文麗至通也仕
不苟祿絕高也辭隆從窳絜操也書後漢

銘論

太平御覽集不載

春秋之論銘也曰天子令德諸侯言時計功大夫稱伐
昔肅慎納貢銘之楛矢所謂天子令德者也黃帝有巾
几之法孔甲有槃杆之誡殷湯有甘誓之勒讒鼎有不
顯之銘武王踐阼咨太師作席几楹杖器械之銘十有
八章周廟金人緘口書背銘之以慎言亦所以勸進人
主勗乎令德者也呂尚作周太師封於齊其功銘於昆
吾之冶獲寶鼎於美陽仲甫有補袞闕誠百辟之功周
禮司勳凡有大功銘之太常所謂諸侯言時計功者也

宋大夫正考父三命茲益恭而莫侮其國衛孔悝之祖
莊叔隨漢陽左右獻公衛國頌之皆銘乎鼎晉魏顆獲
秦杜回於輔氏銘功于景鐘所謂大夫稱伐者也鐘鼎
禮樂之器昭德紀功以示子孫物不朽者莫不朽於金石
故近世以來咸銘之於碑德非此族不在銘典

大遼注
銘論昔

名公作誥先王賜朕
鼎出於武當曾水

上始加元服與羣臣上壽

伏惟陛下應天淑靈丁期中興誕在幼齡聖姿碩義威

儀孔脩俯仰龍光顏如日星言稽典謨動蹈規矩緝熙
光明思齊周成早智夙就泰美顯宗令月吉日始加元
服進御憤結以章天休臣妾萬國遐邇大小同喜逸豫
式歌且舞臣等不勝踴躍鳧藻謹奉生頭酒九鍾稽首
再拜上千萬壽陛下享茲吉福永守皇極通導太和靖
綏六合宜民宜人受祿于天書曰一人有慶兆民賴之其
寧惟永詩曰顯顯卬卬如珪如璋令聞不忘萬壽無疆

宗廟祝嘏辭

嗣曾孫皇帝某敢昭告於皇祖高皇帝各以后配昔受
命京師都於長安享國十有一世歷年二百一十載遭
王莽之亂宗廟隳壞世祖復帝祚遷都洛陽以服土中
享國一十一世歷年一百六十五載予末小子遭家不
造早統洪業奉嗣無疆闕東吏民敢行稱亂總連州縣
擁兵聚衆以圖叛逆震驚王師命將征服股肱大臣推
皇天之命以已行之事遷都舊京昔周德缺而斯干作
應運變通自古有之於是乃以三月丁亥來自雒越三

月丁巳至於長安飭躬不慎寢疾旬日賴祖宗之靈以
獲有瘳吉旦齋宿敢用潔牲一元大武柔毛剛鬣商祭
明祀禘合嘉蔬香其醑醑豐本明粢醴酒用告遷來尚
饗

九祝辭

高皇帝使工祝承致多福無疆於爾嗣曾孫皇帝使爾
受祿于天宜此舊都萬國和同兆民康乂眉壽萬年子
子孫孫永守民庶勿替引之

祝社文

白帖○下三條集並不載

元正今午時惟嘉良乾坤交泰太簇運陽乃祀社靈以祈福祥

祓楔祝文

北堂書鈔

洋洋暮春厥自祓除有求百福在洛水渚

祖餞祝

太平御覽

今歲淑月日吉時良爽應孔嘉君當遷行神龜吉兆休氣煌煌著卦利貞天見三光鸞鳴嚶嚶四牡彭彭君既

升輿道路開張風伯雨師洒道中央陽燧求福蚩尤辟
兵倉龍夾轂白虎扶行朱雀道引元武作侶勾陳居中
厭伏四方往臨邦國長樂無疆



東漢文紀卷二十

欽定四庫全書

集部

東漢文紀卷二十一

詳校官庶吉士_臣陳若霖

主事銜_臣徐以坤覆勘

總校官進士_臣楊懋珩

校對官中書_臣范 鏊

謄錄監生_臣周 桐

欽定四庫全書

東漢文紀卷二十一

明 梅鼎祚 編

蔡邕

光武濟陽宮碑

惟漢再受命曰世祖光武皇帝考南頓君初為濟陽令
濟陽有武帝行過宮常封閉帝將生考以令舍下濕開
宮後殿居之建平元年十二月甲子夜帝生時有赤光
室中皆明使卜者王長卜之長曰此善事不可言歲有

嘉禾一莖生九穗長於凡禾因為尊諱王室中微哀平
短祚姦臣王莽偷有神噐十有八年罪盈惡熟天人致
誅帝乃龍見白水淵躍昆蚡破前隊之衆殄二公之師
收兵畧地經營河朔戮力戎功翼戴更始義不即命帝
位闕焉於是羣公諸將據河洛之文叶符瑞之珍僉曰
歷數在帝踐祚允宜乃以建武元年六月乙未即位鄩
縣之陽五成之陌祀漢配天不失舊物享國三十六年
方內又安蠻夷率服巡狩泰山禪梁父皇代之遐迹王

者之上儀罔不畢舉道德餘慶延于無窮先民有言樂
樂其所自生而禮不忘其本是以虞稱嬀汭姬美周原
皇天乃眷神宮實始于此厥跡邈哉所謂神麗顯融越
不可尚小臣河南尹鞏瑋先祖銀艾封侯歷世卿尹受
漢厚恩瑋以商箕餘烈郡舉孝廉為大官丞來在濟陽
願見神宮追惟桑梓褒述之義用敢作頌頌曰赫矣炎
光爰耀其輝篤生聖皇二漢之微稽度乾則誕育靈姿
黃孽作慝篡握天機帝赫斯怒爰整其師應期潛見扶

金定四庫全書
卷二十一
陽而飛禍亂克定羣凶殄夷匡復帝載萬國以綏巡于
四嶽展義省方登封降禪升於中皇爰茲初基天命孔
彰子子孫孫保之無疆

陳太丘碑

先生諱寔字仲弓潁川許昌人也含元精之和應期運
之數兼資九德總修百行於鄉黨則恂恂焉斌斌焉善
誘善導仁而愛人使夫少長咸安懷之其為道也用行
舍藏進退可度不徼訐以干時不遷怒以臨下四為郡

功曹五辟豫州六辟三府再辟大將軍宰聞喜半歲太
丘一年德務中庸教敦不肅政以禮成化行有謚會遭
黨事禁錮二十年樂天知命澹然自逸交不諂上愛不
黷下見幾而作不俟終日及文書赦宥時年已七十遂
隱丘山懸車告老四門脩禮閑心靜居大將軍何公司
徒袁公前後招辟使人曉諭云欲持表便可入踐常伯
超補三事佩紆金紫光國垂勲先生曰絕望已久飾巾
待期而已皆遂不至宏農楊公東海陳公每在衮職羣

僚賀之皆舉手曰潁川陳君命世絕倫大位未躋慙於
丈仲竊位之負故時人高其德重於公相之位也年八
十有三中平三年八月丙子遭疾而終臨沒顧命留葬
所卒時服素棺槨財周觀喪事唯約用過乎儉羣公有
僚莫不咨嗟巖藪知名失聲揮涕大將軍弔祠錫以嘉
謚曰徵士陳君稟嶽瀆之精苞靈曜之純天不慙遺一
老俾屏我王梁崩哲萎于時靡憲縉紳儒林論德謀績
謚曰文範先生傳曰郁郁乎文哉書曰洪範九疇彝倫

攸敘文為德表範為士則存誨沒號不亦宜乎三公遣
令史祭以中牢刺史敬弔太守南陽曹府君命官作誄
曰赫矣陳君命世是生含光醇德為士作程資始既正
守終有令奉禮終沒休矣清聲遺官屬掾吏前後赴會
刊石作銘府丞與比縣會葬荀慈明韓元長等五百餘
人總麻設位哀以送之遠近會葬千人以上河南尹种
府君臨郡追歎功德述錄高行以為遠近鮮能及之重
部大掾以成斯銘可謂存榮沒哀死而不朽者也乃作

銘曰我我崇嶽吐符降神於皇先生抱寶懷珍如何昊
穹既喪斯文微言圯絕來者曷聞交交黃鳥爰集于棘
命不可贖哀何有極

陳太丘廟碑銘

維中平五年春三月癸未豫州刺史典以褒功述德政
之大經是以作謚封墓興於周禮衛鼎晉銘其昭有實
故太丘長潁川許昌陳寔字仲弓含聖哲之清和盡人
才之上美光明配於日月廣大資乎天地辟四府宰三

城神化著於民物形表圖於丹青巍巍乎其不可尚也
洋洋乎其不可測也儉約違時懸車致仕徵辟交至遂
不屑就春秋八十有三寢疾而終大將軍賜諡羣后建
碑國人立廟先生有二子季方元方皆命世希有繼則
特立季方盛年早亡亦圖容加諡元方在喪毀瘠消形
嘔血純孝過哀率禮不越於時嘉異畫像郡國欽盛德
之休明懿鍾鼎之碩義乃樹碑鐫石垂世寵光詞曰於
皇先生冠耀八荒闡德之宇探道之網繼期立表以訓

四方惟亮天工羣生之望高明允實有馥其芳載德奕
世休有烈光欽慕在人舊有憲章過牧斯州庶奉清塵
棄予而邁靡瞻靡聞嗟我懷矣曷所咨詢告哀金石式
昭其勤

文範先生陳仲弓銘

君諱寔字仲弓潁川許人也其先出自有虞氏中葉當
周之盛德有媯滿者武王配以太姬而封諸太昊之墟
是為陳胡公春秋之末失其爵土遂以國氏焉世篤懿

德令聞不顯君膺皇靈之清和受明哲之上姿憑先民
之遐迹秉元妙之淑行投足而襲其軌施舍而合其量
夫其仁愛溫柔足以孕育羣生廣大寬裕足以包履無
方剛毅強固足以威暴矯邪正身體化足以陶冶世心
先生有此四德者故言斯可法行斯可樂動斯可象靜
斯可效是以邦之子弟遐方後生莫不同情瞻仰由其
模範從其趣尚戾狠斯和爭訟化讓雖嚴威猛政迫以
刑戮未若先生潛導之速也其立朝事上也恭順貞厲

含章直方無顯諫以彰直不割高而引長常幹州郡腹
心之任義則進之以達道否則退之以光操然後德立
名宣盖于當世辟司徒府納規陳謀匡弼三事人用昭
明台階允寧遷聞喜長清風暢于所漸儉節溢於監司
郡政有錯爭之不從即解綬去復辟太尉府遷太丘長
民之治情歛慙反於端懿者猶草木之偃於朔風百卉
之挺於春陽也以所執不協所屬色斯舉矣不俟終日
辟大將軍府道之行廢有分於命乃罹密網以就禁錮

潛伏不試十有八年大忌蠲除舉賢良方正大將軍司徒並辟君曰七十有懸車之禮況我過諸遂不應其命容止法度老而彌壯凡所履行事類博審不可勝數略舉首目其實錄記在乎其傳春秋八十有三中平三年八月丙子卒大將軍三公使御屬往弔祠會葬作誄謚曰文範先生刺史太守樹碑頌德許令以下至於國人立廟舊邑四時烝嘗歡哀承祀其如祖禰先生存獲重稱亡歆血食行修於已得斯於人固上世之所罕有前

哲之所不過也孤嗣紀銜恤在疚敢錄言行終始所守
乃有三友生咨度禮則咸曰君化道神速行於有國
法施于民祀典所宗鄉人之祠非此遺孤所得專也昔
者先生甚樂茲土築室講誨精靈所寧紀順奉雅意遂
定兆域宜有銘勒表墳墓俾後生之歌詠德音者如丘
封之存斯也乃作銘曰於熙文考天授宏造淵元其深
巍哉其高剛而無虐柔而不撓誕鋪模憲示世作教君
之誨矣民胥傲矣道行斯進廢乃斯止鮮我顯奉既多

幽否含榮取辱涅而不緇德之休明賤不為恥超邈其猷莫與方軌

郭有道林宗碑

邕謂盧植馬日磾曰吾作天下碑銘多矣惟郭有道無愧色

先生名泰字林宗太原界休人也其先出自有周王季之穆有虢叔者實有懿德文王咨焉建國命氏或謂之郭即其後也先生誕膺天衷聰睿明哲孝友溫恭仁篤柔惠夫其器量宏深安度廣大浩浩焉汪汪焉真乎不可測已若乃砥節勵行直道正辭貞固足以幹事隱括

足以矯時遂考覽六籍探綜圖緯周流華夏游集帝學
收文武之將墜拯微言之未絕于時纓綬之徒紳佩之
士望形表而景附聆嘉聲而響和者猶百川之歸巨海
鱗介之宗龜龍也時乃潛隱衡門收朋勤誨童蒙賴焉
用祛其蔽州郡聞德虛已脩禮莫之能致羣公休之遂
辟司徒掾又舉有道皆以疾辭將蹈洪崖之遐跡紹巢
由之絕軌翔區外以舒翼超天衢以高峙稟命不融享
年四十有三以建寧二年正月乙亥卒凡我四方同好

之人永懷哀悼靡所置念乃相與推先生之德以圖不朽之事僉以為先民既沒而德音猶存者亦賴之於紀述也今其如何而闕斯禮於是建碑表墓昭銘景行俾芳烈奮乎百世令聞顯於無窮其詞曰於休先生明德通元純懿淑靈受之自天崇壯幽濬如山如淵禮樂是悅詩書是敦匪惟撫華乃尋厥根宮牆重仞允得其門懿乎其純確乎其操洋洋縉紳言觀其高棲遲泌邱善誘能教赫赫三事幾行其招委辭召貢保此清妙降年

金
卷二十一
不永民斯悲悼爰勒茲銘摘其光耀嗟爾來世是則是效

太尉橋公廟碑

橋氏之先出自黃帝帝葬於橋山子孫之紹基立姓者咸以為氏漢興世以禮樂為業高祖諱仁位至大鴻臚列名於儒林祖侍中廣川相考東萊太守公稟性貞純幼有宏姿剛而不虐威而不猛聞仁必行睹義斯居文以典術守以純固弱冠從政當官而行刺史周公辟舉

從事所部二千石受取有驗公糾發贓罪致之於理時
有椒房桂戚之託周公累息公不為之動史魚之勁直
山甫之不阿於是始形舉孝廉除郎中洛陽左尉特進
潁王梁不疑為河南尹當事以對是時畏其權寵而為
屈辱者多矣公不折節解印綬去辟司徒舉高第補侍
御史以詔書考司隸校尉趙祁事廷尉郭貞私與公書
非接使銜命之宜公封書以聞貞以文章得用鬼薪公
離司寇辟大將軍梁公幕府屢以救正于其隆指將軍

嘉之無言不讐又以高第補侍御史在職旬月羌戎匪
茹震驚隴漢西府舉公拜涼州刺史威名克宣凶虜革
心清風席卷至則無事車師後部阿羅多卑君相與爭
國興兵作亂公遣從事牛稱何傳舉輕騎奉辭責罪叔
阿羅多卑君繫燉煌正處以聞阿羅多為王卑君侯稱
以奉使副指除侯部不動干戈揮鞭而定西域之事人
以為美談又值饑荒諸郡饑餒公開倉廩以貸救其命
主者以舊典宜先請公曰若先請民已死廩訖乃上之

詔報曰邊穀不得妄出元擅出於是元有汲黯憂民之心後不以為常公達於事情剖斷不疑皆此類也遷齊相視民如保赤子討惡若赴水火刑明賞遂民知勸懼臨淄令賂財賊多罪正受鞠就刑沒齒無怨竟以不先請免官徵拜上谷太守民有父子俱行凶人人惡言當道曉之不止其子殺人而捕得公以其見悔辨直不舉文書以遇赦令蕃縣有帝舜廟以故事齊祠戶曹史張機有懲罰貨祠巫自託以舜命約公云不得譴公覺其

奸態叔考首伏即日伏辜遷漢陽太守上邳令皇甫禎
賊罪明審叔考髡鉗死于冀市後以病去徵拜議郎司
徒長史循王惺桓帝同產以懷逆謀黜封廕陶王以公
長於襟帶拜鉅鹿太守惺畏怖明憲檢于靜息自將作
大匠徵未到而謗章先入故轉拜議郎遂用免官徵度
遼將軍遷河南尹少府大鴻臚司徒司空託病而去悉
引衆灾雖非已負公皆以自劾遜位歲餘拜尚書令時
河間相蓋升以朝廷在藩國時隣近舊恩歷河南太守

大中大夫在郡受取數億以上創毒深刻公表升貪放
狼藉不顧天網損辱國家為上招怨當肆市朝以謝兆
民幸遇贖令罪除惡在可免升官禁錮終身沒入財賂
非法之物以充帑藏懲戒羣下連表上不納而升遷為
侍中公稱病辭徙拜光祿大夫復拜太尉如前遜位復
拜少府病不就職拜太中大夫凡所獲祿皆公府所特
表選臨難受位自九列之後乃以丕貶公紀綱張弛勇
決不回見是非明作速於察機燕居從容申申夭夭和

樂寬裕愛士親仁凡見公容貌聞公聲音莫不熙怡悅
懌思樂模則來者忘歸去者願還雅性謙克不吝於利
欲雖衆子羣孫並在仕次曾無順媚一言之求身沒之
日無獲大位在百里者莫得好縣比方公孫未有若茲
者也初公為舍於舊里弟卒推與具孤至於即世樞殯
無所清儉仁與之效於斯為著巍巍乎若德允世之表
儀也已公諱元字公祖少辟孝廉辟司徒大將軍府為
侍御史牧一州典五郡出將邊營入掌機密歷三卿同

三司享年七十五光和七年夏五月甲寅以太中大夫
薨于京師朝廷所以弔贈如前傳之儀九月乙酉葬於
某所三孤故臣門人相與述公言行咨度禮制文德銘
于三鼎武功勒於鉦鉞官簿次第事之實錄書于碑陰
以昭光懿俾爾昆裔永有仰於碑陰云光光烈考伊漢
元公克明克哲實叡實聰如淵之後如嶽之嵩威壯虎
虎文繁雕龍撫柔疆垂戎狄率從敷教中夏五典攸通
帝謂我后朕嘉君功命君三事時亮天工公拜稽首翼

翼惟恭左右天子祇厥勲庸庶績既熙黎民時雍上下

謚寧八方和同丕顯伊德作憲萬邦

水經注引故臣至光懿作銘鼎文亦

不言
邕作

太尉橋公碑頌

公諱元字公祖梁國睢陽人也大鴻臚之曾孫廣州相
之孫東萊太守之元子也膺受純性誕有特表岐嶷而
起等總角而逸羣至於初紳高明卓異為衆傑雄其性
疾華尚朴有百折不撓臨大節而不可奪之風經藝傳

記周覽博涉瑰奇在前靡所不識當世是以服重器歸
高名州郡交請待以訪斷歷端首則義可行處爪牙而
威以布察孝廉除郎中洛陽左尉以公事去辟司徒舉
高第侍御史直道而往用光其任辟大將軍西府表拜
涼州刺史遷齊相以公事去詔書印綬即家拜上谷太
守遷漢陽太守徵拜議郎司徒長史鉅鹿太守被詔書
為將作大匠為受罰者所章拜議郎即徵拜度遼將軍
遷河南尹少府大鴻臚遂陟司空司徒託病遜位起家

拜尚書令以疾篤請拜光祿大夫後拜太尉久病自替
復為少府太中大夫春秋七十五光和七年五月甲寅
薨公性質直不憚強禦在憲臺則有畫規之忠領州郡
則有虎賁之威其拔賢如旋流討惡如霆擊每所臨向
清風先翔遠近豫震茲可謂超越衆庶彰於遠邇者已
於是故吏司徒博陵崔烈廷尉河南吳整等以為至德
在已揚之由人苟不皦述夫何考焉乃共勒嘉石永昭
芳烈遂作頌曰赫矣橋公秉文握武內為宗幹出為藩

輔在憲彈枉竟由厥矩允牧于涼刈彼裔土爰將度遠
亦用齊斧敷教四畿旋統京宇敦茲五服衆庶是與膺
踐七命翼我哲聖登空補袞陟徒訓敬尹尉清宸熙帝
之政終始為貞典章以定遺愛在民皇哀其命立石刊
銘莫遁斯聽魂而有靈萬億其盛

漢太尉楊公碑

公諱賜字伯猷弘農華陰人姬姓之國有楊侯者公其
後也其在漢室赤泉侯佐高丞相翼宣咸以盛德光於

前朝祖司徒考太尉繼跡宰司咸有勛烈公承家崇軌
受天醇素欽承奉構閑於伐柯烈風維變不易其趣文
藝典籍尋道入與操清行朗潛晦幽閒不荅州郡之命
辟大將軍府不得已而應之遷陳倉令公乃因是行退
居廬公車特徵以病辭司空舉高第拜侍中越騎校尉
帝篤先業將問故訓公以羣公之舉進授尚書于禁中
遷少府光祿勳敬揆百事莫不時序庶尹知恤閭閻推
清列作司空地平天成陰陽不忒公遂身避託疾告退

又以光祿大夫受命司徒敬敷五品宣洽人倫燮和化
理股肱耳目之任靡不克明及至太尉四時順動三光
耀潤羣生豐遂太和交薄三作六卿五蹈三階受爵開
國應位特進非盛德休功假于天人孰能該脩寵榮
包令錫如公之至者乎公體資明哲長於知見凡所辟
選升諸帝朝者莫非瑰才逸秀并奉儲佐惟我下流二
三小臣穢損清風愧于前人乃糾合同寮各述所審紀
公勲績刊石勒銘以慰永懷銘曰天降純嘏篤生柔嘉

俾膺祖考光輔國家三業在服帝載用和粵暨我公尤
執丕貞在棟伊隆于鼎斯寧德被宇宙華夏以清受茲
介福履祚孔成為邑河渭袞冕紱珽以佐天子祗事三
靈丕顯伊德萬邦作程爰銘爰贊式昭懿聲

文烈侯楊公碑

公諱賜字伯猷魚通五典周覽篇籍以為尚書帝王之
要政有國之大本也是以三葉相承研其精義五代之
微言王政之約網罔不尋其端源究其條貫凜乎其見

聖人之精旨也蓋以蹈騰餘縱思高游夏初潛山澤受
誨童冠後生賴以發袪蒙蔽文具材素者蓋不可勝數
乃由宰府遂作帝臣于時聖幼將入學羣公以公溫故
知新德宜師保乃以越騎校尉援侍華光之內帝坐已
北面以納大誨其教人善誘則恂恂焉罔不伸也引情
致喻則闇闇焉罔不釋也迄用有成緝熙光明惟帝念
功六在九卿三事勛假皇天澤充區域疆土建封申增
戶邑人臣之極位兼而有之然處豐益約九命滋恭可

謂高朗令終有始有卒者已於是門生大將軍何進等
瞻仰洙泗公喪之禮糾合朋徒稽諸典制僉以為匡弼
之功政事之實詔策之文則史臣志其詳若夫道術之
美授之方策則是門人二三小子所特貫綜敢竭不才
謬錄所審言于碑乃申頌曰巍巍聖猷匪師不昭士子
困蒙匪師不教於皇文父邈哉伊超如玉之固如嶽之
喬鑽之斯堅仰之彌高示我顯德授我無隱正席傳道
承帝之問誨茲一人萬邦作順微微我徒實賴遺訓文

武作式元勛既奮光啟爵土垂統末胤存榮亡哀沒而不泯

司空文烈侯楊公碑

曰漢有國師司空文烈侯楊公公惟司徒之孫太尉公之胤子皇祖考以懿德胥及肆勤武建休勲啟洪範公祇服宏業克丕堂構小乃不敢不慎大亦不敢不戒用罔有擇言失行在於其躬洎在辟舉先志載言罔不攸該乃自宰臣以從王事立功不有用辭其祿逮作御史

允執國憲納於侍中在帝左右爰董武事王師孔閑羣
公以舊德碩儒道通術明宜建師保延入華光侍宴露
寢敷典誥之精旨達聖王之聰睿帝以機密齊果常伯
劇任鮮克知臧以釐其采命公再作少府俾率其屬以
熙庶績天地作險國家丕承軍門祛禁式遏寇虐命公
再作光祿勳總其熊羆之士不貳心之臣保乂帝家巖
巖大理惟制民命命公作廷尉惟刑之恤旁施四方惟
明折獄蔽罪于憲之中亦惟三禮六樂國之元幹命公

作大常明德惟馨八音克諧神人以和永世豐年溥天
率土而衆莫外命公作司空公唯戢之翊明其政時惟
休哉惟天陰隲下民彝倫所由順序命公作司徒而敬
敷五教以親百姓父義母慈兄友弟恭子孝時惟休哉
昭教於辟雍命公作三老帝躬以祗敬遵有虞于上庠
茫茫大運垂光烈曜命公作太尉璇璣運周七精循軌
時惟休哉帝欲宣力于四方公則翼之辟道或違公則
弼之虔恭夙夜不敢荒寧用對揚天子丕顯休命天子

大簡其勲用授爵賜封侯于臨晉功成化洽景命有傾
帝乃震慟執書以泣命于左中即將郭儀作策賜公驃
騎將軍臨晉侯印綬兼號特進謚以文烈寵命畢脩而
後即世肆其孤彪敢儀古式昭銘景烈銘曰天鑒有漢
誕生元輔世作三事勛在王府乃及伊公克光前矩悉
心畢力肩其祖武化洽羣生澤霑區宇帝曰文烈朕嘉
君功為邑河渭建茲土封申脩九錫以祚其庸位此特
進于異羣公昔在申呂匡佐周宣崧高作頌大雅揚言

今我文烈帝載用熙參光日月比功四時身歿名存永
世慕思

太傅文恭侯胡公碑

公諱廣字伯始交趾都尉之元子也公應天淑靈履性
貞固九德咸修百行畢脩遭家不造童而夙孤上奉繼
親下慈弱弟崎嶇儉約之中以盡孝友之道及至入學
從訓歷觀古今生而知之聞一覩十兼以周覽六經博
總羣議旁貫憲法通識國典年二十七察孝廉除郎中

尚書侍郎尚書左丞尚書僕射幹練機事綢繆樞極忠
亮唯允簡于帝心智畧周密冠于庶事遷濟陰太守其
為政也寬裕足以容衆和柔足以安物剛毅足以威暴
體仁足以勸俗故禁不用刑勸不用賞其下望之如日
月從之如影響思不可忘度不可革遺愛結于人心起
無窮而垂則徵拜大司農遂作司農遷太尉以援立之
功封安樂鄉侯錄尚書事稱疾屢辭策賜就第復拜司
空功成身退俾位特進又拜太尉復以特進致命休神

又拜太尉遜位歸爵旋于舊土徵拜太中大夫尚書令
太僕太常司徒永康之初以定策元功復封前邑錄尚
書事疾病就第又授太傳入參機衡五蹈九列七統三
事諒闇之際三據冢宰和神人於宗伯理水土於下台
訓五品於司徒耀三辰于上階光弼六世歷載三十自
漢興以來鼎臣元輔耄耄老成勲被萬方與國終始未
有若公者焉春秋八十二建寧五年三月壬戌薨于位
天子悼惜羣后傷懷詔五官中郎將任崇奉冊贈以太

傳安樂鄉侯印綬拜室家子一人即中賜東園秘器賜
絲帛含歛之脩中謁者董詡弔祠護喪錢布賻賜率禮
有加賜諡曰文恭昭顯行迹四月丁酉葬于洛陽塋故
吏濟陰池喜感公之義率慕黃鳥之哀推尋雅意彷徨
舊土休績丕烈宜宣于此乃樹石作頌用揚德音詞曰
於皇上德懿鑠孔純大孝昭脩思順履信膺期命世保
茲舊門淵泉休茂彪炳其文爰贊天機翼翼唯恭夙夜
出納紹跡虞龍賦政于外神化元通普被汝南越用熙

雍帝曰休哉命公三事乃耀柔嘉式是百司股肱元首
庶績咸治二氣燮雍五徵來脩勲格皇天澤洽后土封
建南藩受茲介祐玉藻在冕毳服艾輔輅車雕駟四牡
修扈贊事上帝祇祀宗祖陟降盈虧與時消息既明且
哲保身遺則同軌旦奭光充區域生榮死哀流茲罔極

太傅胡公碑

維漢二十有一世建寧五年春三月既生魄八日壬戌
太傅安樂鄉侯胡公薨越若來四月辛酉葬我君文恭

侯於是掾太原王允雁門畢整屬扶風曾宙潁川殷歷
等僉謂公之德也柔而不犯威而不猛文而不華實而
不朴靜而不滯動而不躁總天地之中和覽生民之上
操聰明膚敏兼質先覺涉觀憲法契濶文學觀準陶之
闡聞探孔子之房奧然而約之以禮守之以恭寬之以
納衆汎愛多容其誘人也恂恂焉怡怡焉能使蒙惑開
析偽戾優順逸惰勤信及其創基發跡機密聖朝其知
其能夙夜惟寅以允帝命是以頻繁機極三升而不出

馬乃還譚其舊章彌綸古訓貫萬品研精微用補前臣
之所闕十年而無愆強記同乎富平周慎過於博士偶
山甫乎喉舌足虞龍而納言唯帝命公以二郡其為政
也導人以德帥物以已敦以忠肅勵以知恥人悅其化
天樂其和士相勉於公朝民勸行於私家徽纏縈而靡
係鞭朴棄而無加洋洋乎若德宣治嚴以為威寬以為
福而已哉五作卿士七蹈相位太僕司農太傅司空各
一司徒特進各二太常太尉各三光輔六世歷載三十

有餘其致治也通水泉於潤下蕃后土於稼穡訓五品
於羣黎泰人物於區域耀三辰於渾元協大中於皇極
傳聖德於幼冲率旦奭於舊職譬彼四時功成則退在
盈思冲升隆以順建封域于南土踐殊號于特進榮祚
統業垂乎來胤公自二部及登相位凡所辟用遂至大
位者故司徒中山祝括其餘登堂閣據賦政策勲樹功
流化者蓋不可勝載唯我末臣頑蔽無聞仰慕羣賢惡
乎可及自公寢疾至于薨斃泰與嘗禱列在喪位雖庶

物戮力不愆于禮進覲墳塋几筵空設退顧堂廡音儀
永闕感悼傷懷心肝若割相與累次德行撰舉功勲刊
之于碑用慰哀思其詞曰煥文德伊朝后應期運作漢
輔喜中興膏民庶澤洪渟亶攸序亘地區充天宇嶙高
達踵遐武揚景烈垂不朽仰遷古耀昆後

胡公碑銘

公諱廣字伯始南郡華容人也其先自媯姓建國南土
曰胡子春秋書焉列于諸侯公其後也考以德行純懿

官至交趾都尉公寬裕仁愛覆載博大研道知幾窮理
盡性凡聖哲之遺教文武之未墜罔有不綜年二十七
察孝廉除郎中尚書侍郎左丞尚書僕射內正機衡允
釐其職文敏暢乎庶事密靜周乎樞機帝用嘉之遷濟
陰太守公乃布愷悌宣柔嘉通神化渠靈和揚惠風以
養真激清流以盪邪取忠肅于不言消奸宄于爪牙是
以君子勤禮小人知恥鞠推息于官曹刑戮廢于朝市
餘貨委于路衢餘種棗于畝畝遷汝南太守增修前業

考績既明入作司農實掌金穀之淵藪和鈞關石王府
以充遂作司徒昭敷五教進作太尉宣暢渾元人倫輯
睦日月重光遭國不造帝祚無主援立孝桓以紹宗緒
用首謀定策封安樂鄉侯戶邑之數加于羣公入錄機
事聽納總已致位就第復拜司空敷土導川俾順其性
功遂身退告疾固辭乃為特進爰以休息又拜太常典
司三禮敬恭禋祀神明嘉歆永世豐年聿懷多福復拜
太尉尋申前業又以特進逍遙致位又拜太常邁疾不

夷遜位歸爵遷於舊都徵拜太中大夫延和末年聖主
革正幸臣誅斃引公為尚書令以二千石居官委以閫
外之事釐改度量以新國家宏綱既整袞闕以補乃拜
太僕車正馬閑六駟習馴遷太常司徒成宗晏駕推建
聖嗣復封故邑與參機密寢疾告退復拜太傅錄尚書
事于時春秋高矣繼親在堂朝夕定省不違子道旁無几
杖言不稱老居喪致哀率禮不越其接下荅賓雖幼賤
降等禮從謙厚尊而彌恭勞思萬機身勤心苦雖老耄

子嬰兒其服方叔克壯其猷公旦納于台屋正考父俯而循禮曷以尚茲夫烝烝至孝德本也體和履忠行極也博聞周覽上通也勤勞王家茂功也用能十登三事篤受介祉亮皇業于六王嘉丕績於九有窮生人之光寵享黃耇之遐紀蹈明德以保身與福祿乎終始年八十有三建寧五年春壬戌薨於位天子悼痛贈策賜誄諡曰文恭如前傳之儀而有加焉禮也故吏司徒許詡等相與欽慕崧高蒸民之作取言時計功之則論集行

跡銘諸琬琰其詞曰伊漢元輔時惟文恭聰明叡哲思
心瘁容畢力天機帝休其庸賦政于外有邈其蹤進作
卿士粵登上公百揆時序五典克從萬邦黎獻共唯時
雍勲烈既建爵上乃封七被三事再作特進宏唯幼冲
作傳以訓赫赫猗公邦家之鎮澤被華夏遺愛不倫日
與月與齊光並運存榮亡顯沒而不泯

胡太傅祠前銘

天鑒有漢山嶽降靈於肅文恭應期誕生好是懿德未

惠且貞爰在初服皇嘉其聲納于機密機密惟清守于
三邦三邦事寧越尹三卿百揆時序七受帝命作此元
輔左右六世靖綏土宇蠹彼羣生保賴亶叙紹跡龍夷
繼軌山甫遭國不造仍世短祚援立聖嗣得公之謨帝
曰文恭朕嘉君功為邑安樂以佑其庸登位特進于異
羣公休命丕顯光寵克章公拜稽首是對是揚藹藹惟
公民斯攸望春秋既暮脩爾乃喪不慙是遺俾屏於皇
新廟奕奕于以烝嘗子子孫孫承嗣無疆

司空楊公碑

君諱秉字叔節宏農華陰人其先蓋周武王之穆晉唐
叔之後也末葉以支子食邑于楊因氏焉周室既微裔
胄無緒暨漢興烈祖楊喜佐命征伐封赤泉侯嗣子業
紱冕相繼公之丕考以忠蹇亮弼輔孝安登司徒太尉
公承夙緒世篤儒教以歐陽尚書京氏易誨授四方學
者自遠而至蓋踰三千初辟司徒舉高第拜侍御史遷
豫州兗州刺史任城相徵入勸講拜太中大夫左中郎

將尚書出補右扶風留拜光祿大夫遭權嬖貴盛六年
守靜外戚火燔乃遷太僕太卿公事絀位浹辰之間俾
位河南憤疾豪強見逼姦黨用嬰疾廢起家復拜太常
遂陟三司沙汰虛冗料簡貞實抽援表達與之同蘭芳
任鼎重從駕南巡為朝碩德然知權過於寵私富侔國
大臣苛察望變復還條表以聞啟漢上怒其時所免州
牧郡守五十餘人饗戾是黜英才是列善否有章京夏
清肅在位七載年七十有四延熹八年五月丙戌薨朝

廷惜馬寵賜有加公自奉嚴敕動遵禮度量材授任當
官而行不為義絀疾是苛政益固其守厨無宿肉器不
鏤雕夙喪嬪儷妾不嬖御可謂立身無過之地正直清
儉該脩者矣昔仲尼嘗垂三戒而公免焉故能匡朝畫
直獻可去奸忠侔前後聲塞宇宙非黃中純白窮達一
致其惡能立功立事敷聞于下昭升于上若茲巍巍者
乎於是門人學徒相與刊石樹碑表勒鴻勳讚懿德傳
億年於戲公唯嶽靈天挺德翼至神氣網緼仁哲生應

台任作邦楨帝欽亮訪典刑道不惑迄有成光遐邇穆
其清

司空臨晉侯楊公碑

皇帝遣中謁者陳遂侍御史馬助持節送柩陳遵桓典
蘭臺令史十人將羽林騎鉦車介士前後鼓吹以驃騎
將軍官屬及司空法駕與公卿尚書三臺以下葬我文
烈侯三年九月甲申小祥會如初四年九月戊申大祥
公卿尚書三臺以下會如小祥之禮公之祖納忠于前

朝以罹艱禍父隱約蟄瘁治家師道唯儉之尚公生值
歎徧資賄屢空手執勤役遠涉道里以修經術險阻艱
難曷所不嘗特以其靜則貞一審固動則不違則度含
容覆載無競伊人謀無不忠言無不信自在弱冠布衣
之中固已流芳名著茂實公孫同倫莫能齊焉者矣州
郡禮招莫之能屈委百里位辟公車令自侍御史侍中
已往道為帝師德為世表體尊名重階級彌崇而公處
以恭遜行以固慎德大而心小居高而志降夫驕吝之

釁周公其猶病諸而公脫然以為行首不亦奉乎及其所以匡輔本朝忠言嘉謀造膝危辭當事而行言從計納亦不敢宣密誠潛功貽于帝躬家無遺草論者不見嗟乎誠為達事君之體得人臣之上儀者已公素不貴歸非不樂引美故雖彷彿猶不敢載以順公之雅初受封自以功不副賞前後固辭章凡十上憂慍悄悄形于容色雖不克從情旨昭顯晚節為廷尉公曰昔在三后成功惟殷于民而皋陶不與焉蓋吝之也及為特進又

曰唯漢重臣中興以來克稱斯位者其唯高密元侯乎
吾何德以堪諸寢疾固命無辭要言約戒忠儉而已孤
彪銜恤永思輟輯所履以贊銘之銘曰赫赫烈侯卓爾
超倫於唯楊公乃華降神故能明哲德亞聖人受茲介
福位極人臣包羅五典本道根真為國之師誨上經文
頻歷卿校五登鼎鉉建名著忠確越前賢攘災興化蟲
豸不臻風雨以時屢獲有年三葉宰相應祚于天臨晉
是侯子子孫孫億兆不窮如山之堅四時潔祀以承所

尊祀事孔明奉亡如存馥馥芬芬用慰顯魂

漢故太尉陳公之碑

隸釋篆額○鄭樵通志金石畧蔡邕文并書在徐州

歐陽棐集古錄目不著書撰人名氏

君諱球字伯真有虞氏之稟也當周盛德有虞遏父為

陶

闕下

公生公子完適齊為桓公公正其後強大遂有齊

上楚漢之

闕下

官生七有令名廣漢太守公既慕世業不

隊前軌孝友祗穆

闕下

典誥徹言雖頌情指憲發綱統莫

不守其將貫綜其倫理采

闕下

換東城門候虔恭職司夙

夜匪解遷繁陽令寬

以闕二字

溫而

闕下

遺跡邈而不

闕

喪母去官服除辟司徒府拜侍御史

闕下

陸梁荆揚州

郡

闕

弱莫能禁御大尉楊秉舉公

闕下

帥後

闕二

弱

闕三字

難一

闕

而平詔書

闕五

十萬州

闕下

公發遣家屬辟

闕二字

難公赫

闕下

有言者斬乃悉

闕

人民老弱

闕

共

闕三字

材為

大弧

闕下

攻前

闕

遇之弘衆而遁全郡保

闕六

拜子男

闕下

作大匠孝栢晏駕

闕四

躬親功

闕下

司空高元表公為河

南

闕

惟明克

闕

公

闕下

遂作司空通導水泉稼穡繁阜陰

陽下致仕賜榮而退復拜永樂少府光和下而不撓雖

有周之申甫漢仇之匡翟下知公之明德其辭曰

於顯明德峻詰闕二亶闕卒度伊闕下

肆釋云大凡碑碣率與史傳牴牾球之二碑獨繫陽
事迹不同所書零陵平賊事雖石破文缺其存者皆
與傳合至廷尉永樂時則一辭不措故熹平之議光
和之謀咸無焉殆有所畏而然也左傳虞闕父為周
陶正而此作遏父陳敬仲至齊為工正掌百工之官
也而此作公正太尉橋公而此作喬皆借用也○碑
以隊為墜番為
稽弘為引字

陳球碑陰

故吏

闕九字

息

故吏

闕二字

平恩

闕三字

祖早終

息

權

闕下

吏

闕二字

嚴

闕三字

五百故吏

闕六字

五百故吏

闕四字

允明

千

故民繁

闕二字

嚴

子夏

二百故

闕三字

嚴

追季祖

三百故

民

闕二字

嚴

李安

二百故

民

闕二字

許

顯德

二百故

民

闕五

字遷

二百故

吏

闕二字

吳憲

元將

千故

吏

闕二字

毛

闕君

五百故

吏

闕二字

王

子

五百故

吏

闕四字

元起

五百故

闕三字

侯高

君舉

五百故

吏

闕二字

周清

文德

五百故

吏

闕二

字趙

闕字

子興

五百故

吏

闕二字

岐周

子然

五百故

吏

闕二字

李忠世持二百故

闕三字

王茂季盛十闕上公乘儀元表二

千闕上趙

闕下

故吏繁

闕下

故吏繁陽

闕下

故吏繁陽

闕下

故吏繁

陽李

闕下

故吏繁陽李

闕下

故民繁陽

闕下

故吏繁陽

闕下

劉闕下故

吏繁陽張

闕下

故吏繁陽

闕下

公五百故吏繁陽

闕下

劉闕下

闕下

劉闕下

三百故吏繁陽

闕下

嚴

五百故吏犁陽

闕下

郭闕下

闕下

選五百

故吏內貫馮

闕下

三百

故吏內黃焦

闕下

松

闕下

二百故民

庠公李

闕下

十故吏庠

闕下

公王

闕下

二百故吏陰

闕下

安審配

闕下

二百故吏陰

闕下

安

闕下

訓

闕下

三

十故吏

闕下

列人孟

闕下

條闕下

二百

隸釋云故吏其中皆有息字次行息之上又有早終字蓋謂二人者已卒所出緡錢則其子也水經云下邳陳球墓前有三碑是弟子管寧華歆等造此碑所見皆故吏故民而無管華姓名其一則弟子所立乎又姓苑載吳氏兄弟各分一姓曰吳春桂炔字皆九畫一音引漢太尉陳球碑陰有城陽吳橫此碑亦不見之趙氏但有一碑陰○犁陽為黎陽

漢故小黃門譙君之碑

隸釋篆額○金石略云蔡邕文在冀州集古錄目不

載書撰人名氏○黃長睿東觀餘論云信安何籀以隸書名目是碑為蔡中郎書未知何據

君諱敏字漢達鄴君之中子章君之弟郎中君之昆也

其先故國師譙贛深明箕隲識錄圖緯能精徹天意傳
遺與京君明君承厥後不忝其美勇而好學才略聰敏
詩書是綜言合雅謨慮中聖權既體在公忠允篤誠
直佐主帥下惟約肅將忝命振之亏外羣寮有司各敬
爾儀君商時度世引已倍權守靜微亢韜光韞玉
呂遠悔咎耻與鄰人靡並拾驅識真之忝謂君為喆在
皆甯武當亨南凶難老之禱昊天不惠降茲殛殛年
五十有七
呂中平二年三月九日戊寅卒嗚呼哀哉國喪良佐

家隕棟梁遐邇咨悼杰女良懷寮朋親感莫不共聲泣涕雙流於是立表寫憤斯銘傳于罔極其辭曰

於穆使君盛德昭明爰惟齡業帥由舊章文武彬彬柔肅能斟屈道從政令名顯揚臣多醜直是用遜讓且呂

毓姿優遊

闕字

京曷僅邁罹景命不長屋棟頽覆君


闕一

字喪亡如何如何吁嗟昊蒼身退名存永世遺芳中平

四年七月廿八日癸卯造

隸釋云耻與鄰人屏竝拾驅說文屏音剗羊相厠也一云傍入曰屏拾音洽鋤押也此句蓋是不與屏闕

冠劍並驅之意漢人書姓雖亦借用如橋喬伍五之類甚多此碑以焦贛為焦贛所謂京君明即京房也左傳楚師伐陳取焦夷注謂焦今燕縣若是則焦燕可以通用漢碑多借意作億此云曷億遇罹却是借億作意也
亨讀作享



東漢文紀卷二十一